

tam opulenta gente divitibusque regnis. Sed illud cœlestium bonorum majus erit & amplius, quod divino nomine fortiter dimicaturis polliceor. Ad hæc Pontificis verba ex toto confessu acclamatum ferunt, Deum ipsum ita velle. Tum Pontifex, indicto silentio: Ite ergo, inquit, viri fortes, & id verbum quod ex ore omnium uno tempore manavit, protessera vobis in bello sumite: crucemque ex rubro panno, qui in novam profecturi sunt expeditionem, sagis dextro humero assuant. Hic res mira narratur, & nisi Deum piis interesse consiliis crederemus, vix referenda: eodem die, quo hæc apud Claromontem acta sunt, famam decreti belli ad extremas terræ oras pervenisse. Interim vero, dum illo ipso conventu Urbanus & alii, de novi Imperatoris creatione, quæ præter cætera omnium animos in expectationem erexerat maximam, agerent; tenuissetque ea consultatio aliquot dies, multa mortalium millia ad novum bellum devota, in speciem concionis astitisse dicuntur. Nec ita multo post ad trecenta armatorum millia ad præsentem expeditionem parata sese itineri accinxisse. Ea Christiani nominis multitudo ductores habuit, Gothifredum, Eustachium & Balduinum Bolionios: Raimundum Ægidii, & Rubertum Flandriæ Comites: Hugonem cognomento Magnum, Philippi Galliæ Regis fratrem: Stephanum Carnoti Comitem: Podiensem Antistitem: & Petrum Eremitam novæ expeditionis auctorem. Is ut primas belli partes obiisse videretur, cum Balduino & fratribus per Germaniam, Pannoniam, ac Thraciam ingenti armatorum manu Constantinopolim venit: Podiensis Antistes, Raimundus, Hugo Magnus, & Stephanus Carnoti majoribus omnino copiis in Italiam transgressi, Romam ad Pontificem venerunt. Hinc tripartito profecti, pars una Brundisium, altera Barium, tertia Hidruntem petiere: sed iis qui per Appuliam ducebat, Boemundus Guiscardii filius, homo impiger, tam inclytæ expeditionis fama jam antea motus, socia arma junxit. Dum copiæ quæ in Italia erant, sese ad profectionem expediunt, interim Eremita, qui cum Bolioniis fratribus Byzantium venerat, Thracio Bosphoro, qua proximum fuit, copias in Asiam trajecit; quod ut

1097

*Duces lallâ
bujus.*

*Copia undi-
quaque mis-
tuntur.*